



**Issittoq atomip nukinganik atuiffiunngitsoq pillugu politikkimik suliniuteqaqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.**  
(Inatsisartunut ilaasortaq, Sara Olsvig, Inuit Ataqatigiit)

Nalunngilarput amerlaqisut atomip nukinga nunarsuatsinnut uumasuinullu tamanut ulorianartorsiortitsisut isigimmassuk. Aamma taamaattumik Demokraatini paasilluarsinnaavarput amerlasuut atomip nukinganut akerliummata kissaateqartoqarmallu Issittumi atomip nukingata atorneqannginnissaanut politikkeqassasoq. Isumaqataaangilagulli.

Nukissiornermi periarfissat assigiinngitsut qiviarutsigit, tamarmik ajunngitsortaqlutillu ajortortaqrput. Isumaqarpugut pingaaruteqartoq suut tamarmik ataatsimut isiginissaat. Assiliaq ataatsimoortoq assigiinngiaarneruvoq qernertumut qaqtumullu naleqqiullugit. Ataatsimut isigalugu atomip nukinga ikummatissanut nunap iluaneersunut naleqqiullugu mingutsitsinnginnerusarpoq, ilisimatuut amerlasuut naapertorlugit. Ilumoorpoq nunarsuarmi sumi tamaani ajutoortoqartarmat. Kisianni nukissiuutit suulluuniit atoraluarutsigit taamaappoq naak nunatsinni erngup nukinga atorlugu nukissiuutit pigisagut minguinnerpaatut taasariaqaraluartut.

Aalajangiinissatsinni ajornartorsiutit annersaraat, Issittoq atomip nukinganik atuiffiussannginneranut atatillugu aalajangiiniarnitsinni atoratsigit paasissutissat atomip nukinganut tunngasut ukiunik 50-nik pisoqaassusillit. Ilumoorpoq atomip nukinganik atuneq sionatigut takusarsimasarput, nunatsinni kissaatiginanngimmat. Atomilli nukinga siunissami takkukkumaartussa q mattukkusunngilarput, ilisimanngikkallartillugu qanoq isikkoqassanersoq. Atomip nukinga tulleeq atorneqalersussaq reaktori atorlugu aallaaveqartussaavoq thoriumimik, taannalu isumannaanerullunilu aalaakkaanusussaavoq maannakut nukissiorfinnut atorneqartunut naleqqiullugu. Taamaattumik imaaliinnarluta siunissami issittumi atomip nukingata atorneqannginnissaa isumaqatigiinngilarput.

Taamaattumik siunnersuut itigartipparput.